

5.- O desenvolvemento sustentábel, imprescindible para o benestar social

Os concellos gobernados polo BNG aplicarán unha política medioambiental guiada por dous obxectivos: a preservación e protección do contorno e a súa posta en valor como esteo do desenvolvemento local e, en particular, rural.

5.1.- O marco de actuación: a Axenda 21 Local

O BNG impulsará a implantación de Axendas 21 Locais, que recollan os obxectivos xerais deste programa -o desenvolvemento sustentábel e a participación cidadá- a través dos seus instrumentos -a auditoría ambiental e o plano de acción local-. A Axenda 21, a concellaría de medio ambiente e as accións transversais serán o marco en que se desenvolverán as nosas accións políticas.

5.2.- Actuacións sectoriais

A. Abastecemento da auga

O BNG promoverá nos concellos a elaboración dun plano da auga (municipal e/ou comarcal, segundo os casos) que se ha guiar polos seguintes obxectivos:

- a) Deseñar e executar redes de abastecemento que xeneralicen a subministración regulada a poboacións.
- b) Garantir a saúde pública con tratamentos acaídos que aseguren a potabilidade e calidade da auga.
- c) Evitar o malbaratamento da auga, promovendo o seu aforro nos fogares e instalacións públicas mediante campañas de sensibilización e a modificación das ordenanzas fiscais para gravar o consumo real incentivando o aforro do recurso.
- d) Regular usos directos e indirectos: doméstico, enerxético, industrial, pesqueiro, agro-gandeiro, recreativo e turístico.

B. Tratamento dos Residuos Sólidos Urbanos (RSU)

- a) Promoveranse proxectos de ámbito municipal ou comarcal que teñan como obxectivo a redacción, a reutilización e a reciclaxe ademais da compostaxe e autocompostaxe, pondo en marcha medidas para incentivar a redución na xeración dos RSU.
- b) Potenciarase a recollida selectiva mediante a separación da materia orgánica, promovendo a súa compostaxe, e doutros compoñentes de lixo, promovendo a súa reutilización e reciclaxe. Apoiarase a creación de industrias de reciclaxe.
- c) Faranse campañas de sensibilización social para potenciar a redución, a reutilización e a reciclaxe así como a utilización de materiais reciclados.
- d) Elaborarase, onde for necesario, un plano de selado e eliminación de vertedoiros. Aplicaranse medidas de control e disciplina para evitar vertedoiros incontrolados.

C. Tratamento dos residuos líquidos

É obxectivo do BNG o saneamento integral dos concellos, o que implicará a posta en marcha das seguintes medidas:

- a) Deseño e execución de redes de sumidoiros, con separación de pluviais e fecais.
- b) Creación de infraestruturas para o tratamento das augas residuais: EDAR velando polo seu menor impacto ambiental posíbel e, alí onde for factíbel, procedementos de depuración de carácter extensivo, -tratamento de lagoaxe, filtros verdes e zonas húmidas en xeral-.
- c) Sempre que sexa viábel, abordaranse tratamentos que tendan á reutilización da auga para usos produtivos.

D. Enerxía

- 1.- Abastecemento:** velarase porque as empresas fornecedoras do servizo cumpran coas súas obrigas e garantan a subministración a toda a poboación.
- 2.- Control do impacto:** regularanse e, no seu caso, xestionaranse medidas de supresión ou minoración dos impactos paisaxísticos e dos riscos para a saúde: trazados de liñas de alta tensión, localización dos centros de distribución, soterrado das liñas de media tensión en nucleos de poboación e de baixa tensión que afecten a conxuntos histórico-artísticos e monumentos.
- 3.- Aforro e enerxías limpas e renovabeis:**
 - a) Promoveranse programas de aforro enerxético con planos de mellora da iluminación pública municipal,
 - b) Estabeleceranse convenios coa Consellaría de Innovación e Industria para instalacións térmicas e fotovoltaicas nos edificios públicos municipais e para a creación dun servizo de transporte nas cidades por medio do alugueiro de bicicletas...
 - c) Fomentarase entre a poboación, sempre que sexa posíbel, as enerxías limpas e alternativas facilitando asesoramento técnico, xestión de subvencións, etc...
 - d) Cooperarase co goberno galego na ampliación da rede de distribución do gas natural a todas as cidades e principais vilas de Galiza.

E. Mellora do medio ambiente urbano

- a) Facilitar a mobilidade peonil, ampliando os seus espazos de uso, fronte á motorizada.
- b) Eliminar as barreiras arquitectónicas e sensoriais.
- c) Potenciar o transporte colectivo e o uso da bicicleta mediante o deseño de redes e outras medidas de promoción.
- d) Incrementar, protexer e coidar espazos de uso público que sirvan como lugares de convivencia e lecer (prazas, parques, xardíns, zonas peonís...).
- e) Elaborar planos para a rexeneración integral de zonas urbanas e periurbanas singularmente degradadas.
- f) Deseñar planos de mellora das infraestruturas e do medio nas parroquias máis afectadas polo medre da “urbanización”, evitar a desintegración dos núcleos de poboación tradicionais e ordenar acadamente os novos núcleos.
- g) Aprobar ordenanzas de protección do medio ambiente.

F. Contaminación ambiental

Ademais do exercicio efectivo das competencias municipais incluídas na lexislación en materia de protección medioambiental, o BNG impulsará actuacións de planificación urbanística e ordenación territorial encamiñadas a evitar ou eliminar situacións de contaminación ambiental (atmosférica, vertidos, acústica, electromagnética, lumínica,...): planos de usos permitidos, incentivos para a relocalización de actividades industriais en espazos reservados para estas actividades, racionalización do transporte... Desenvolveranse campañas de sensibilización sobre o cambio climático e as medidas individuais e colectivas para adoptar.

G. Incendios forestais

Os gobernos municipais do BNG porán en marcha, coordinadamente coa Xunta de Galiza, medidas en materia de prevención e extinción de lumes forestais. Adoptaranse as seguintes medidas:

- a) Cooperación co Goberno Galego no establecemento de “faixas de protección” dos núcleos de poboación. A difusión entre a poboación da Lei de prevención de incendios forestais e demais normativa de desenvolvemento.
- b) Colaboración e apoio ás iniciativas das CMVMC dirixidas á ordenación do monte e á prevención dos lumes forestais.
- c) Cooperación con todos os axentes sociais e institucionais implicados na loita contra o lume nos labores de vixilancia do monte (potenciación do voluntariado, policía local,...)

H. Espazos naturais

- a) Inventariado do patrimonio medioambiental.
- b) Elaboración e execución dun Plan de protección do patrimonio medioambiental que incluírá medidas para a súa preservación e vixilancia e de restauración e posta en valor ambiental, social e económico.

I. Animais abandonados

- a) Campañas de sensibilización para evitar o abandono de animais.
- b) Impulsaranse medidas coordinadas entre os concellos e outras administracións para establecer un servizo de recollida e crear instalacións para a súa garda e mantemento.

K. Educación ambiental

Deseñaranse actuacións en materia de educación ambiental en función das posibilidades dos concellos e, no seu caso, en cooperación coa Xunta de Galiza: campañas de sensibilización e educación ambiental, aulas da natureza, centros de interpretación,...